

*(Dit e-mailtjen hawwe eerst eins sturen wild mar twie e-adressen gavven nao meer as een maond 'niet thuus'. We willen oonze neuze – krek as die ezel - gien dadde keer stoten.)*

Beste heer Ten Oever,

Wij van de stichting Stellingwerfs Eigen (sSe) bin onderdehaand een jaor of wat 'lid' van SONT. An now toe biwwe daor niet slim enthousiast over. Dan zoj' zeggen kunnen: dan hool ie d'r toch mit op. Mar dat kan toch eins niet de bedoeling wezen, liekt oons. Et is vaeks beter en praot d'r eerst es over.

Veur zoe'n gesprek neudigen we jow dan ok graeg uut. Dat kan hier argens in oonze mooie Stellingwarven, in bijglike Ommen of argens halverwegens. Doe mar een veurstel veur plak en tied. Et past oons gienertied mar we kun haost altied wel (7/24).

Oonze 'grieven' gaon veural over de kommenikaosie tussen SONT en heur 'leden'. As d'r bijglike achterof een bericht naor oons toe komt dat d'r vanalles gaonde is en dat SONT uut naeme van alle bij heur ansleuten organisaosies praot of schrift, dan zowwe dat liever eerst ok van teveuren weten. Zo kwawwe d'r deur slim toeval achter dat d'r op 30 oktober 2009 een symposium over de staotus van et Nedersaksisch hullen wodden zol in Eanske. En et emmertien leup krek even over doe we vernammen dat meneer de veurzitter niet even de muuite neumen hadde om oons ok even dag te zeggen op dat symposium. Zo groot is SONT toch niet?

Kotomme, ok wij willen graeg een positieve bijdrege leveren mar moe'n daor wel toe in staot steld wodden. Daoromme zowwe oons graeg es oge in oge mit jow verstaon en waachten jow veurstel veur plak en tied dan ok mit belangstelling of.

Mit een vrundelike groet uut Stellingwarf,  
stichting Stellingwerfs Eigen  
Piet Bult (sikt.)